

Ich will derr doch nor gut

So zwische de Johrn nimmt merr sich joo immer was vor. Mol e bissi abnemme odder nimmi so vill Bier trinke odder widder mol mett de Fraa e paar Daach fortfahrn odder so ebbes in der Art.

Wie mich moin ahle Kumpel Schorsch korz nooch Neijohr besucht hott, habb ich gleich e Fläschje Woi uffgemacht, unn noochdem mir de ersde Schluck gedrunke hadde, habb ich de Schorsch gefroocht, was er sich so vorgenumme hätt ferrs neie Johr.

De Schorsch hott gar nit long ze iwwerleeche brauche. Ich habb merr nix vorgenumme, awwer wenn ich kennt, det ich merr was wünsche.

Dess is joo was, habb ich gesacht, awwer was deste derr dann wünsche?

De Schorsch hott sich umgeguckt ob moi Fraa nit in de Näh iss unn hott gepischpert: Ich wär ab unn zu gern e mol e Zeitlong unsichtbar unn wenss nor ferr e Stund wär.

Ich habben von de Seit gestumpt. Du Schluri, du dest dann gern inn onnernleits Schloofstubb gucke, gebs zu.

De Schorsch hott nur mied gelächelt. Honnes, dess wassde doo sehe konnst siehsde jeden Owend im Fernseh. Naa, ich wär ab unn zu gern emol unsichtbar unn ich det dann nix onnerst mache als mich dehoom uff moi Kautsch in de Wohnstubb ze setze.

Ich habb de Kopp geschittelt. Dess mussde merr erklärn, Schorsch, dess versteh ich nit.

Unsichtbar soi unn dann nix onnerst mache als sich dehoom uff die Kautsch ze setze? - naa, doo kennt ich mir was Besseres vorstelle. Warum dann grad uff die Kautsch setze?

De Schorsch druff: No ja, weil doo kennt ich emol e Stund gonz ferr mich soi, mol e Stund nix mache, nor noochdenke unn nit gestört wernn.

Dess habb ich nit kabiert unn habb gesacht: So e Stund konnsde derr doch aach nemme, wennde nit unsichtbar wärst. Doo setzde dich oofach uff die Kautsch unn sachst dem Kättche, dassde emol e Zeitlong noochdenke willst.

De Schorsch hott de Kopp geschittelt. Dess geht nit. Du kennst dochs Kättche, die kann dess nit versteh dass ich doositz unn nix mach, awwer aach nit schloof, nor in die Luft guck unn iwwer was noochdenke due. Doo kimmtse gleich, hockt sich newer mich, fiehlt moin Puls unn frächt ob ich kronk wär odder ob merrs nit geschmeckt hätt odder ob merr sunnst was fehle det, ob de Fernseher kabutt wär odder ob was Schlimmes in de Zeidung stehe det, was ich ihr nit saache will. Lauter so Sache, awwer du glaabst gar nit, was dess Getüttel mich uffrecht. Naa, ich wär gern emol unsichtbar.

Ich frooch: Unn wie stellsde derr dess vor? Oofach ‚batsch‘ unn du bist nimmi ze sehe?

Naa, moont de Schorsch, ich det saache ich fahr uff de Markt unn dann det ich erst oi-kaafe, det mich dann hoomschleiche unn mich uff die Kautsch setze unn e onnerhalb Stund später det ich so mache als käm ich hoom, so als ob nix gewese wär Awwer wenn ich mir dess richdisch iwwerleech, dann geht dess aach nit.

Ei warum dann nit?, habb ich gefroocht.

De Schorsch hott gonz traurich geguckt. Waaßde was ich dann heern det? Ei wo kimmsden her, iss was bassiert, ei ich habb merr Gedonke gemacht, ei ich wollt dich schunn oorufe, awwer du host doi Händy nit mettgenomme, jedes Mol saach ich derr nemms Händy mett wennde fortgehst, ferr was hossdes dann, ei ich will derr doch nor gut – unn so weider unn so weider.

Ich habb de Schorsch nor ooguckt unn gedenkt: Merr kann aach vor lauder Lieb enn Monn so dricke, dasser koo Luft mehr kriecht. Eiern Honnes